

## 天堂 ê 賞賜滿滿

「會曉 óa 靠上帝 ê 奴僕實在有福氣，因為 in 會成做天國 ê 子民！  
 (《全民台語聖經》馬太福音 5：3)

Tī 咱 ê 世界，「賜福」kah「sàn-chhiah」chit 兩個詞並無 tiān-tiān 真 sù 配，kám m̄ 是？總是，基督堅持講，「心靈 ê sàn-chhiah」事實上是「有福 ê。」祂 ê 意思是啥物 leh？

「心靈 sàn-chhiah ê 人」感覺家己個人 ê 不足 á 是謙遜；in 無相信 in 家己身心 ê 能力有夠額 thang 來面對生活 kah 所有 ê 挑戰。因為 in 歡喜 óa 靠上帝，所以 in 願意 tī in ê 思想過程，kah 建立 in ê 生活優先 ê 時，lóng 遵趁上帝 ê 旨意，in 明白 án-ne 做是 siōng 好 ê。

另外一方面，「心靈好額 ê 人」kah 法利賽派 ê 人非常相像(sio-siàng)，in 相信 in 家己知影所有 ê 答案。In kah 咱現今世上的一 kóa 宗教領袖仝款，in tī 屬靈方面承擔權威的角色。本質上，in 講：「這是我對聖經 ê 詳細解釋，而且我期待所有 ê 信徒 lóng 接納它；任何無接納我 ê 解釋 ê 人 tòh 是違反上帝 ê 律法，因此是下等 ê，koh 會受譴責。」Tī 阿富汗 ê 塔利班組織中（譯註：the Taliban，20 世紀 90 年代掌權 ê 阿富汗伊斯蘭教政治 kah 軍事組織，對社會 kah 婦女 ê 看法極其傳統）咱有看 tiòh chit 種態度 ê 一個極端 ê 例，總是，極端主義 ê 傾向 mā 發生 tī 咱家己 ê 信仰中。

心靈 sàn-chhiah ê 人無想 beh 採取 chit 種驕傲 ê 優越態度，in 無聲稱 in 知影所有 ê 答案，卻顛倒是對上帝謙卑講：「上主 ah，我知我無全部 ê 答案。我 ê 人生是取決 tī kah 祢有適當 ê 關係，意思 tòh 是我是你 ê 僕人，m̄ 是你 ê 顧問。所以，求祢 chhōa 我去祢 beh 去 ê 所在。」

心靈 sàn-chhiah ê 人歡喜順服天頂 ê 權柄，koh 通過謙卑 kah 持續 ê 祈禱，承諾家己 beh 遵行上帝 ê 旨意。In 無充滿驕傲 kah 傲慢，致使 hō in 成做「受祝福 ê 人」kah 天國 ê 繼承人。

祈禱：上主 ah，求祢 hō 我開闊 ê 心，koh 幫助我了解，耶穌 chiah-ê 話 m̄-nā 適用 tī 兩千年前祂 ê 門徒身上，mā 適用 tī 今 á 日 ê 我。當我 kah 人交往 ê 時，求祢 hō 我查看我 ê 心靈深處，看我是啥物人，以及我應該是啥物款人。求祢 hō 我智慧 kah 勇氣，kā chit-ê 至大 ê 福氣應用 tī 我 ê 生活中。我 án-ne 懇求是奉耶穌 ê 名。阿們。

(1999.08.01)